

ጳውሎስ ዲሞቴዮስ ፃፊዳ ኮይር ኪታ ጋሳ ቆፋ

ዲሞቴዮስ ጌቲቲያ፡ አማኒያ ናዓቲላይ፡ ጉላ ኢሲያን ዩሌቲስ (ሃ.ኦ 16:1-3)። ኢያ ኣያ ኣይሁዳ፤ ኢያ ኣዋይ ቃሲ ገሪኬ ኣሲ። ኢ ጳውሎሳራ ኢሲፌ ኦሌይሳኔ ዋንጌላ ኦሶን ጳውሎሳ ማታን ማዲያ ኣሲ። ጳውሎስ ዲሞቴዮስ ፃፊዳ ኮይር ኪታይ ሄቩ ኣይፌ ቆፋታ ማንሱ ዪሌስ።

ኡባፌ ኮይርቲዲ ኪታይ፡ ዋሳ ኬላን ዳንዲዳ ዋርዶ ቲሚርቲያባ ማንሱዲ ኦዳስ። ሃ ኢማላ ቲሚርቲይ ኣይሁዳ ቲሚርቲያፌ ባጋ፡ ቃሲ ኣይሁዳ ገዶና ኣሳ ቲሚርቲያፌ ባጋ ኦይኪስ። ሄሲካ፡ «ሃ ቤንቲያ ኣላሜይ ናጋራን ኢቲዳ ገሾ ኣሲ ኣቶቲላ ዳማናው ዲማ ገዲዳ ፀራ ኤራናው፡ ኢሲ ኢሲ ካላታ ዋና ኣጋናውን ማቸ ኤኮና ዋይኮ ኣዚና ጌሎና ኣጋናው ኮሼስ» ያገያ ቆፋ ባሶ ኦሌዲ ዳንዲስ።

ናምዓንሉ ቆፋይ፡ ዋሳ ኬላ ኣይሶባኔ ጎይኖ ዋጋባ ታማርሲያ ቲሚርቲያ፡ ሄሳዳካ ዋሳ ኬላ ካሌሌይሳቲኔ ኤንታ ማዳይሳቲ ኣይ ማላ ማራ ዱሱ ዳናው ቤሲያኮ ኦዳስ።

ወርሴላን፡ ዲሞቴዮስ ዩሱስ ኪሪስቶስ ኦሌያ ሎዖ ኣሲ ዋኒዲ ገዳናው ቤሲያኮ፡ ቃሲ ዲማ ዲማ ኣማኒያ ኣሳ ማታን ኢያው ዳዒያ ኣዋቲላይ ኣይቤኮ፡ ጳውሎስ ኢያ ዘሪዳ ዘሪያ ዳሞስ።

1 ዲሞቴዮስ ኪታ ኣይፌ ቆፋታ

ጌሎ ቆፋ 1:1-2

ዋሳ ኬሌ ኣይሲያ ኣሳስ ኢሜቲዳ ኣይሶ ዋጋ 1:3-3:16

ዲሞቴዮስ ኢሜቲዳ ቲሚርቲያ 4:1-6:21

1 ኩና ኣሺያ ያሳኒኔ ኩ ኡፋይሳን ናገያ ዩሱስ ኪሪስቶስን ኪቲቲዳ፡ ዩሱስ ኪሪስቶስ ሃዋሬ ገዲዳ፡ ጳውሎሳ፤ 2 ኣማኖን ታው ቲማ ናዓ ገዲዳ ዲሞቴዮስ።

ያሳ ኩ ኣዋ፡ ኩ ጎዳ ኪሪስቶስ ኣጼ ኬሃቲላይ፡ ማርቲላይኔ ሳርቲላይ ኔው ገዶ።

ዋርዶ ቲሚርቲያፌ ናጌቲሌ

3 ታኒ ማቄዶኒያ ባሼ ኔና ሃዳሪዳይሳዳ፣ ኢሲ ኢሲ አሳቲ ዋርዶ ቲሚርቲያ ታማርሴይሳ ዲጋናው ኔ ኤፌሶናን ጋምዓና ሜላ ኮያይሰ። 4 ኤንቲ ጎረ ባይና ሃይሴ ኦዳኔ ባንታ ኮቻ ታይቡዋ አጋናዳ ኦዳ። ሄሳ ሜላባይ ፓላማ ካሌጼሲፔ አቲን አማኖን ኦሴቲያ ያሳ ኦሱዋሰ ማዴና። 5 ሃ ኪታ ሁዔ ቆፋይ ጌሻ ዋዛናፔ፣ ሎዎ ካሃፔኔ ቱማ አማኑዋፔ ቤንቲያ ሲቁዋ ዴንጼላናሳ። 6 ኢሲ ኢሲ አሳቲ ሃይሳ አጊዲ፣ ፓላና ኦዳኮ ሲሚዶሶና። 7 ኤንቲ ያሳ ሂጊያ አሰታማሬ ጊዳናው ኮዮሶና። ሺን ኤንቲ አይ ኦዲያኮ ዋይኮ ቱማ ኦሊዲ ኦዴይሰ ኢ አይቤኮ ኤሮኮና።

8 አሲ ቤሴይሳዳ ሂጊያን ጎዔቲኮ ሂጊይ ሎዎ ጊዴይሳ ኤሮሰ። 9 ኢሲባ አከካናው ኮሼሰ። ሂጊይ ሎዎ አሳሰ ሜጴቲቤና። ሺን ሂጊይ፣ ሂጊ ሜንጼይሳታ፣ ዋራንቸታ፣ ያሴ ያዮናይሳታ፣ ሸምፖፖ ዋጴይሳታ፣ ናጋራንቸታ፣ ጌሻቴሊ ባይናይሳታ፣ ቱናታ፣ ሃሪ አቶሺን ባንታ አዪው ዋይኮ አዋ ዋጴይሳታ፣ 10 ላሜይሳታ፣ አዳይ አዳራ ላይማቴይሳታ፣ አሴ ባይዜይሳታ፣ ዋርዶንቸታ፣ ዋርዶን ጫቄይሳታ፣ ዋይኮ ቱማ ቲሚርቲያራ ጋሄቶና አይ ኦሶ ኦሌይሳታ ሴራናው ከዪሰ። 11 ሄ ቲሚርቲይ ቦንቸኔ አንጆቲዳ ያሳይ ታኒ አዋጃና ሜላ ታው ሃዳራ ኢሚዳ ዋንጌላ ጊዶን ዴዔሰ።

ያሳ ማርቲላሰ ጳውሎሲ ጋላቲዳ ጋላታ

12 ታኒ ኦሊያ ኦሱዋን ታው ዋልቃ አሚዳ ኑ ጎዳ ኪሪሰቶሰ ዬሱሳ ጋላታይሰ። ታና ባ ኦሱዋሰ ሹሚዲ ሄ ኦሱዋሰ ቤሳሳ ጊዲ ታይቢዳ ጊሾ ኢያ ጋላታይሰ። 13 ታኒ ሃይሳፌ ካሴ ኢያ ጫዬይሳ፣ ኢያ ዬዴጼይሳኔ ሜቶጼይሳ ጊዲኮካ ታኒ ሄሳ ኤሮናኔ አማኖና ኦሊዳ ጊሾ ያሳይ ታና ማሪሰ። 14 ኑ ጎዳይ ባ አጶ ኬሃቴላ ታ ቦላ ጉሲዲ፣ ሄ አጶ ኬሃቴላራ አማኖኔ ሲቆ ኪሪሰቶሰ ዬሱሳ ባጋራ ታው አሚሰ።

15 «ኪሪሰቶሰ ዬሱሲ ናጋራንቸታ አሻናው ሃ አላሚያ ዪሰ» ጊያ ቃላይ አማንጼይሳኔ አሳ ኡባይ ኤካናው ቤሴይሳ። ኡባፌ አጲዳ ናጋራንቸይ ታና። 16 ሺን ሜሪና ዴዑዋ ኤካናው ኢያ አማኒያ አሳሰ ታኒ ለሚሶ ጊዳና ሜላ ዬሱሰ ኪሪሰቶሲ ዳር ዳንዳዒሰ። ታው ኡባፌ አጲዳ ናጋራንቸዋሰ ያሳይ ባ ማርታ ዳርሲሰ። 17 አይፌን ቤንቶናይሳሰ፣ ኢሲ ያሳሰ፣ ሃይቆናይሳሰ፣ ሜሪና ካዉዋሰ፣ ሜሪናፔ ሜሪና ጋካናው ጋላታይኔ ቦንቸይ ጊዶ። አሚንዒ።

18 ዲሞቴዮስ፡ ታ ናዓው፡ ካሴ ኔባ ናቤቲ ኦዲዳ ቃላ ቦላ ኤቃዳ ሃ ኪታ ሃደራ ኔው ኢማይስ። ኔ ሄ ቃላ ካሊኮ ሎዖ ኦላ ኦሌታና። 19 ኣማኖይ ኦዖ ካሂ ኔው ዴዖ። ኢሶቲ ኢሶቲ ካሃ ቆዩዲ ማርካቤይ ሆቤን ቆዩይሳዳ ባንታ ኣማኑዋ ቆይሲደሶና። 20 ሄሳ ሃሲዳይሳታ ጊደን ሄሜኔዮሲኔ ኢስኪንዲሬይ ዴዖሶና። ኤንቲ ታማሪዲ ያሳ ጫዬይሳ ኣጋና ሜላ ታኒ ፃላሄስ ኤንታና ኣላ ኢማስ።

2

ዋሳባኔ ጎይናባ

1 ኡባሬ ሲንፋታዳ፡ ኣሳ ኡባስ ያሳ ኦይቻናው፡ ዋሳናው፡ ጋናታናውኔ ጋላታናው ቤሴይሳ ታኒ ኔና ኣኬኪሳይስ። 2 ኦኒ ቱማ ኣያና ዴዖኒኔ ጌሻቴላን ያሳ ጎይኒሼ ሳርቴላኒኔ ዋፑ ጊዳ ዴዖን ዳና ሜላ ካዎታሲኔ ሹማታ ኡባስ ዋሲቲ። 3 ሄሳ ሜላ ዋሳይ ኦና ኣሺያ ያሳ ሲንፋን ሎዖኔ ኡፋይሲያባ። 4 ያሳይ ኣሲ ኡባይ ኣታናዳኔ ቱማ ኤራናዳ ኮዬስ። 5 ኢሲ ያሲ ዴዔስ። ያሳፊኔ ኣሳፔ ጊደን ጊዲዲ ሲጌሊያ ኢሶይ ዴዔስ፤ ኣካ ኣሴ ጊዲዳ ኪሪስቶስ ዬሱሳ። 6 ኢ ኣሳ ኡባ ዋዛናው ባና ኣሊ ኢሚስ። ያሳይ ባ ዋዲያን ኣሳ ኡባ ዋዛናው ኮዬይሳ ቤሲያ ማርካይ ሃይሳ። 7 ያሳይ ታና ዋንጌላስ ኣስታማሬኔ ሃዋሬ ኦሊዲ ደሪዳይ ሄሳሳ። ታኒ ቱማ ኦዳይስ፤ ዋርዶቲኬ፤ ኣማኖኔ ቱማ ኣይሁዴ ጊደና ኣሳስ ማርካታና ሜላ ያሳይ ታና ሹሚስ።

8 ሄሳ ጊሹ፡ ኡባ ቤሳን ዴዒያ ኣዴቲ፡ ባንታና ያሳስ ዲማዩዲ፡ ሃንቆኔ ፓላማ ዲጊዲ፡ ባንታ ኩሺያ ፑዴ ዴንሊዲ ያሳ ዋሳና ሜላ ኮያይስ።

9 ሄሳዳ ማጫሳይ ባንታና ሃሪዳይሳ ቆንጨሲያ፡ ቦንቾይኔ ማሪ ዴዒያ ማዑዋ ማዕናው ቤሴስ። ኤንቲ ማሪ ባይና ሁዔ ዳላን፡ ዋርቃን ዋይኮ ኢንቆን፡ ዋይኮ ኣልዖ ኣፊላን ባንታና ኣሊቂሶፖ።

10 ሺን ያሳስ ጎይናይስ ጊያ ማጫሳይ ባንታው ቤሴይሳዳ ሎዖባ ኦሶና።

11 ማጫሲ ኪቲቴላን ሲዒ ጊዲ ታማር። 12 ታኒ ማጫሳይ ታማርሳና ሜላ ዋይኮ ኣዴ ቦላ ኣዋታና ሜላ ጊደናሺን ሲዒ ጊዲ ዳና ሜላ ኮያይስ። 13 ኣዳሜይ ኮይር ሜዴቲስ፤ ጉዬፔ ሄዋና ሜዴታሱ። 14 ቃሲ ጨማታዳ ያሳ ሃጊያ ሜንሊዳይ ማጫሲፔ

አቲን አዳማ ጊዳና። 15 ሺን ማጫሲ አማኖን፣ ሲቆኒኔ ጌሻቴላን ባንታና ሃሪዲ ዳዒኮ * ናይታ ዩሎን አታና።

3

ዎሳ ኬላ ጪማታ

1 ኦኒካ፣ «ዎሳ ኬላ ካሌሊያ አሲ ጊዳናው ኮይኮ ሎጋባ አሞቴስ» ጊያ ኦዳይ ቱማ። 2 ዎሳ ኬላ ካሌሊያ አሲ ቦሬቶናይሳ፣ ኢሲ ማቺ ፃላሊ ዳዔይሳ፣ ማራን ዳዔይሳ፣ ባና ሃሪይሳ፣ ቤሴይሳዳ ኦሌይሳ፣ አማሌ ሞኬይሳ፣ ታማርሳናው ዳንዳዔይሳ።

3 ማሶቶናይሳ፣ ኦዩቶናይሳ፣ ፓላሞናይሳ፣ ሚሼ ሰቆናይሳ፣ 4 ኢያ ናይቲ ኢያው ከቴቴይሳኔ ቦንቼይሳ፣ ባ ኬላ አይሳናው ዳንዳዔይሳ ጊዳናው ቤሴስ። 5 ኢሲ አሲ ባ ኬላ አይሳናው ዳንዳዎና ኢዲኮ፣ ያሳ ዎሳ ኬላ ዋቲ አይሳናው ዳንዳዒ?

6 ኦቶሮን ሱጌቲዲ፣ ፃላሃይ ያሳ ፐርዳን ኩንዲዳይሳዳ ኩንደና ማላ፣ ኦራሊ አማኒዳ አሲ ጊዳናው ቤሴና። 7 ቦሬኒኔ ፃላሃ ዊሃን ጌሎና ማላ ሄ ኡራይ አማኖና አሳ ማታን ናሼቴይሳ ጊዳናው ቤሴስ።

ዎሳ ኬላ ዳቆኒታ

8 ሄሳዳ ቃሲ ዎሳ ኬላ ዳቆኒቲ ቦንቼቲዳይሳታ፣ ናሞዑ ዶና ኦዩቶናይሳታ፣ ዳር ዎይኔ ኡሻ ኡዮናይሳታ፣ ሚሼ ያሬቶናይሳታ፣ 9 አማኑዋ ፀራ ጌሻ ካሃን ናጌይሳታ ጊዳናው ቤሴስ። 10 ኤንቲ ኮይሮቲዲ ፓጩታናው ኮሼስ፤ ኤንታ ቦላ ቦሬይ ባይና ኢዲኮ፣ ዎሳ ኬላ ዳቆኒ ጊዲዲ አሉ።

11 ሄሳዳካ፣ ኤንታ ማጫሳቲ ቦንቼቲዳይሳታ፣ ዘገሮናይሳታ፣ ማራን ዳዔይሳታ፣ ኡባባን አማኔቴይሳታ ጊዳናው ቤሴስ።

12 ዎሳ ኬላ ዳቆኒቲ ኢሲ ማቺ ፃላሊ ዳዔይሳ ጊደ። ባ ናይታኔ ባ ኬላ ሎይሊ አይሴይሳ ጊዳናው ቤሴስ። 13 ዎሳ ኬላ ዳቆኒ ጊዲዲ፣ ሎጋ ኦሶ ኦሌይሳቲ፣ ኤንታው ጌታ ቦንቾ ቃሲ ኪሪሰቶስ ዩሱሳን ባንታው ዳዒያ አማኑዋባ ኦዳናው ዳር ሚኖቴሌ ዳማና።

ጌታ ፀራ

14 ታኒ ሃ ኪታ ኔው ፃፋሼ፣ ኤሌሳዳ ኔኮ ባና ጋዳ ኡፋይሲ ሞላይስ። 15 ሺን ታኒ ቦና ጋሞዒኮ፣ ያሳ ኬላን አሳይ ዋኒዲ

2:14 ሜዴ 3:1-6 * 2:15 ባንታና ሃሪዲ ዳዒኮ፣ ዎይኮ ኢያ ዩሊዳ ናይቲ አማኖን፣ ሲቆኒኔ ጌሻቴላን ባንታና ሃሪዲ ዳዒኮ። 3:2 ቲቶ 1:6-9

ዳናው ቤሲያኮ ኤራና ማላ ሃይሳ ኔው ፃፋይስ። ዴፆ ያሳ ከላይ ቱማቴላስ ቱሲኔ ባሶ። 16 ኑ አማኑዋ ፀራይ ሲጼይ ባይና ገታ። ኪሪሰቶሲ አሾ ማዒዲ ቆንጨሰ፤

ኢያ ቱማቴላ ጌሻ አያናይ ማርካቲስ።

ኪታንቸታሰ ቤንቲሰ፤

ኢ ካዎቴላ ኡባሰ ሳባኬቲስ።

አላሜን ዴዒያ አሳን አማኔቲስ፤

ቦንቸን ሳሎ ኤኬቲስ።

4

ዋርዶ አስታማሬታ

1 ያና ዋዲያን ባሌሌያ አያናታኔ ቱና አያናታ ቲሚርቲያ ካሊዲ፣ ኢሲ ኢሲ አሳይ አማኑዋ ካዳናይሳ ጌሻ አያናይ ቆንጨሲዲ ኡዲስ። 2 ሄሳ ማላ ቲሚርቲይ ኤንታ ካሃይ ዶጪን፣ አሳ ባሌሌያ ዋርዳንቸ አስታማሬታፔ ዬሰ።

3 ሄሳ ማላ አሳቲ ኤኮኔ ጌሎ ቃሲ ኢሲ ኢሲ ካሳታ ሞና ማላ ዲጎሶና። ሺን አማኔይሳቲኔ ቱማ ኤሬይሳቲ ያሳ ጋላቲ ዋሲዲ ማና ማላ ያሳይ ካሊ ሜጲስ። 4 ያሳይ ሜጲዳ ኡባባይ ሎዎ። ያሳ ጋላቲዲ ሚኮ ዋራ ዋጲያባይ አይቢካ ባዋ። 5 ኡባባይ ያሳ ቃላኒኔ ዋሳን ጌሺ ገዴሰ።

ኪሪሰቶሳሰ አማኔቲዳ አይሌ ገዶ

6 ሄሳ ገሾ፣ ኔኒ ሃ ቲሚርቲያ አማኔይሳታ ታማርሲኮ፣ ኑ አማኑዋኒኔ ሎዎ ቲሚርቲያ ኪቲታዳ ዲጪዳ ኪሪሰቶሰ ዬሱሳ ሎዎ አይሌ ገዳና። 7 ሺን ጎዒ ባይና ቱማ ገደና ኑዳፔኔ ጨማ ማጫሳ ሃይሲያፔ ባቃታ። ቱማ አያና ዴዎን ዳናው ኔና ሎሂሳ። 8 አሲ ባ አሳቲላ ሚንላናው ኡሊያ ኦሶይ ጉሊ ማዴስ። ሺን ቱማ አያና ዴዎን ባና ሎሂሶይ ሃዒካ ማሪናዉካ ዴዎ ኢሚያ ኡፋይሲ ዴዒያ ገሾ ኡባሰ ማዴስ። 9 ሃ ቃላይ አሳ ኡባይ ኤካናው ቤሲያ ቱማ ኡዳ። 10 ኑኒ አሳ ኡባ፣ ኡባፌ አሊዲ አማኔይሳታ አሺያ ዴዎ ያሳፌ ኤካና ገዲ ኡፋይሳን ናጊያ ገሾ፣ ሄሳሰ ኑኒ ኦሶን ዳቡርሲኔ ባጭቶስ።

11 ሃይሳ ኪታኔ ታማርሳ። 12 ኔኒ ያላጋ ገዲያ ገሾ ኔና ኦኒካ ካጵፖ። ሺን አማኔይሳታሰ ኔኒ ኦዳን፣ ኦሶን፣ ሲቆን፣ አማናኒኔ ጌሻቲላን ለሚሶ ገዳ። 13 ታኒ ያና ጋካናው አሳሰ ጌሻ ማፃፋ ናባቦን፣ ሳባኮኒኔ ታማርሶን ሚና። 14 ቲንቢቴይ ኦዴቲን፣ ጨማቲ

ባንታ ኩሺያ ኔ ቦላ ዋሊዳ ዋዴ ኔኒ ኤኪዳ፣ ኔናን ዴዒያ ገሻ ኣያና ኣሞታ ካጵፓ።

15 ኔ ዲቻይ ኣሳ ኡባስ ቆንጫና ማላ ሄሳ ሚንላ ቆፓ፤ ሃይሳ ኡባ ዋዴ ኦላ። 16 ኔ ሁዒያሲኔ ኔ ቲሚርቲያስ ናጌታ። ኔኒ ሄሳ ኡባ ዋዴ ኦሊኮ ኔናኔ ኔና ሲዔይሳታ ኣሻሳ።

5

አምዔታባ

1 ጨማ ኣዴታ ኔ ኣዋዳ ቦንቻፌ ኣቲን ሃንቄቶፋ። ያላጋ ኣዴታ ኔ ኢሻዳ ኦላዳ ፃላ። 2 ጨማ ማጫሳታ ኔ ኣዪዳ፣ ያላጋ ማጫሳታ ኔ ሚቹዳ፣ ፖሎ ጌሻቴላን ኦይካ።

3 ኣዚኒ ሃይቂዳ ቱማ አምዔታ ቦንቻ። 4 ሺን አምዔስ ናይቲ ዋይኮ ናይታ ናይቲ ዴሲኮ፣ ሄ ናይቲ ቱማ ኣያና ዴዖን ዴዔይሳ ቤሳናው ባንታና ዬሊዳይሳታኔ፣ ባንታ ዋጋ ኣዪዒኔ ዋጋ አዋ ማዲዲ ኩሼ ዛር ታማር። ሄሲ ያሳ ኡፋይሲያባ።

5 ባርካ ዴዒያ ቱማ አምዒያ ያሳፌ ማዴ ዴማናው ኡፋይሳን ናጋሱ። ጋላሲኔ ቃማ ያሳይ ባና ማዳና ማላ ዋሳዒሱኔ ኦይቻዒሱ።

6 ሺን ሃ ኣላሚያን ሎዖ ዲሳ ፃላላ ኮያ አምዒያ ፓፃ ዴዓሼ ሃይቂዳር። 7 ኣኒካ ኤንታ ቦርና ማላ ሃ ኪታ ኤንታው ኢማ።

8 ሺን ባ ዳቦታሰ፣ ኡባፌ ኣሊዲ ባ ሶ ኣሳስ ቆፖና ኣኒካ ባ ኣማኑዋ ካዲዳይሳ፤ ኣማኖና ኣሳፔካ ኣጵዳ ኢታ።

9 ላይሊ ኡሱፑን ታሙ ኩሚቦና አምዔ ሱንላ ማዝጋባን ፃፎ። ቃሲ ሄሳ ቦላ ኢያ ባ ኣዚናሰ ኣማኔቲዳር ጊዳናው ኮሼሰ።

10 ናይታ ዲሾን፣ ኢማሌ ሞኮን፣ ጌሻታ ቶሁዋ ሚቻን፣ ሜቶቲያ ኣሳ ማዴን፣ ሎዖ ኦሶ ኡባስ ባና ኣላ ኢሚዳርኔ ሎዖ ኦሶን ኤሬቲዳር ጊዳናው ቤሴሰ።

11 ሺን ያላጋ አምዔታ ሱንላ ማዝጋባን ፃፎ። ኤንታና ኣዚና ጌሎ ጌሎ ጊያ ኣሾ ኣሞይ ኦይኪያ ዋዴ ኪሪሰቶሳ ኣጋና። 12 ኤንቲ ኮይር ጌሊዳ ቃላ ሚንሊዳ ጊሾ ፐርዳታና። 13 ሄሳ ቦላ ኤንቲ ኦሶ ጳዪዲ ኬላፌ ኬሌ ዩያና። ዩሻ ፃላላ ጊዳናሺን ዚጊርሳኒኔ ባንታና ጋሳናባን ጌሊዲ ቤሶናባ ኦይቶሶና። 14 ሄሳ ጊሾ፣ ኑ ሞርኬቲ ኑ ቦላ ኦይቲያ ኢታባ ዴሞና ማላ ያላጋ አምዔቲ ኣዚና ጌሊዲ፣ ናባ ዬሊዲ፣ ባንታ ኬላ ኣይሳና ማላ ዘራይሰ።

15 ሃይሳፌ ካሴ ጉላ አምዔቲ ፃላሄ ካላናው ጉዬ ሲሚዶሶና።

16 ኢሲ ኣማኒያ ማጫሴሰ ሶ ኣሳ ጊዳን አምዔቲ ዴዒኮ ኢያ ኤንታ ማዳናው ቤሴሰ። ሄሳዳ ኦሊኮ፣ ዋሳ ኬላሰ ቶሆይ

ካወደሱ። ሄ ዋዴ ዋሳ ከላይ ማዴ ቤሲያ ቱማ አምዔታ ማዳናው ዳንዳዔስ።

17 ዋሳ ከሌ ሎይሌ ሄሚያ ጨማቲ፣ ኡባፌ አሊዲ፣ ቃላ ሳባኮኒኔ ታማርሶን ዳቡሬይሳቲ ዳኮ ቦንቾ ኤካናው ቤሴስ።

18 ጌሻ ማፃፋይ፣ «ዉዲማን ካላ ዩዲያ ቦራ ዶና ቃቾፋ» ሄሳዳካ፣ «ኦሳንቾይ ባ ዳሞዚያ ኤካናው ቤሴስ» ያኔስ።

19 ናሞቡ ዋይኮ ሄቭ ማርኪ ባይና፣ ዋሳ ከላ ጨማ ሞቲያባ ሲጾፓ። 20 ሃራቲ ያያና ማላ ናጋራ ኦሊያ ኦናካ አሳ ኡባ ሲንላን ሃንቄታ።

21 ኔኒ አሳ ሶሞጦ ቤያና፣ ኢሱዋ ኢሱዋፌ ዲማዮና ሃ ኪታ ናጋና ማላ ያሳ፣ ጎዳ ዩሱስ ኪሪስቶሳኔ ዶሬቲዳ ኪታንቾታ ሲንላን ታ ኔና ዞራይስ። 22 ኦዴ ቦላካ ኔ ኩሺያ ዋላዳ ሹማናው ኤሌሶፓ። ሃራታ ናጋራን ጌሎፓ፤ ኔና ጌሻቴላን ናጋ።

23 ኔኒ ኡባ ዋዴ ሃርጌቲያ ጊሾኔ ኔ ኡሎ ሃርጊያ ጊሾ ሃላ ፃላላ ኡዮፓ፤ ጉላ ዋይኔ ኡያ።

24 ኢሲ ኢሲ አሳታ ናጋራይ ቆንጨ፣ ኤንታ ናጋራይ ኤንታ ፐርዳናው ኤንታፌ ሲንሌ አዴስ፣ ሺን ሃራታ ናጋራይ ጉዬፔ ጋሞዒዲ ቆንጨሱ። 25 ሄሳዳ፣ ሎጾ ኦሶይካ ቆንጨ፣ ቆንጨና ኢዳኮካ ጌማናው ዳንዳዔና።

6

አይሌታስ እሜቲዳ ዞሬ

1 ያሳ ሱንላይኔ ኑ ቲሚርቲይ ጫዬቶና ማላ አይሌቴላን ዴዔይሳቲ ባንታና ሃሪያ ጎዳታ ቦንቾ። 2 አማኒያ ጎዳቲ ዴዒያ አይሌቲ፣ ኤንታ ጎዳቲ ኤንታው ኢሻ ጊዲያ ጊሾ ኤንታ ካዶፖ። ኤንታ ኦሱዋን ማዴቲያ ጎዳቲ፣ አማኔይሳታኔ ዶሴቲዳይሳታ ጊዲያ ጊሾ ኤንቲ ካሴይሳፌ አሊዲ ኦላናው ቤሴስ።

ዋርዶ ቲሚርቲያኔ ቱማ ዲሬቴላ

ኔኒ ሃይሳ ታማርሳናዉኔ ኤንቲ ኦላና ማላ ዞራናው ቤሴስ። 3 ኦኒካ ዲማ ቲሚርቲያ ታማርሲያባ ጊዲኮ፣ ኑ ጎዳ ዩሱስ ኪሪስቶሳ ቱማ ቃላራኔ ኑ አማኑዋ ቲሚርቲያራ ጋሄቴና። 4 ሄ ኡራይ ኦቶሮን ሱቬቴሲፔ አቲን አይኮካ ኤሬና። ኤንታው ኢሲ ቆፋ ቦላ ፓላማናዉኔ ኦይታናው ኢታ አሞይ ዴዔስ። ሄሲ ቃናቴ፣ ኦሺ፣ ጫሺ፣ ኢታ ሲዴኔ፣ 5 ጊንና ፓላማ ካሌሌስ። ቃሲ ኤንታው ኢታ

ዎዛኒ ዴዔስ፤ ቱማካ ባሊደሶና፤ ኤንቲ ያሳ አማኖይ ዱሬቴላስ ኦጌ ጊዲ ቆፖሶና።

6 ሺን ታው ዴዒያባይ ጊዳና ጊያ አሳስ ቱማ አያና ዴያይ ጊታ ዎዴ። 7 ኑኒ ሃ አላሚያ አይኮካ ኤሂቦኮ፤ ቃሲ ኢያፔ አይኮካ ኤኪዲ ቦኮ። 8 ኑሰ ካሊኔ ማያይ ዴዒኮ ሄሲ ጊዳና። 9 ሺን ዱሬቴላ ኮዬይሳቲ ፓጩኒኔ ዲሂን ጌሎሶና። ቃሲ ኤንታና ዱጌ ዳሬያኔ ቆይሲያ ኤያቴሊኔ ቆሂያ አሞን ኩንደሶና። 10 ሚሼ ሲቆይ ኢታቴላ ኡባሰ ፑልቶ። ኢሶቲ ኢሶቲ ሚሼ አሞቴሼ አማኖፔ ባለቲዲ ዳር ሜቶን ባንታና ዬጊደሶና።

ዲሞቴዮስ ኢሜቴዳ ዞሬኔ ኪታ

11 ሺን ኔና፣ ያሳ አሶ፣ ሄሳፌ ባቃታ። ዲሎቴላ፣ ያሳ ዳና፣ አማኖ፣ ሲቆ፣ ዳንዳዓኔ አሽኬቴላ ካላ። 12 አማኖ ባዲያ ሎይላ ባዳታ። ዳር አሳ ሲንላን ኔ ማርካቲዳ ኔ አማኑዋባ፣ ያሳይ ኔና ኢያው ያጊዳ ሜሪና ዴዑዋ ኦይካ። 13 ኡባሰ ዴያ አሚያ ያሳ ሲንላን፣ ጳንጻ ጸላያሳ ሲንላን ሎያ ማርካ ማርካቲዳ ኪሪሰቶሲ ዬሱሳ ሲንላን ታ ኔና ኪታይሰ። 14 ኑ ጎዳ ዬሱሰ ኪሪሰቶሲ ቆንጫና ጋካናው ሃ ኪታ ባሊኔ ቦሬይ ባይና ናጋ። 15 ባ ፃላላ ኡባ ሃሪያ ቦንቾ ያሳይ፣ ካዎታ ካዎይ፣ ጎዳታ ጎዳይ፣ ባ ቆፒዳ ቃማን ዬሱሰ ኪሪሰቶሳ ዛሪ ኪታና። 16 ኢሲ ኢያ ፃላላ ሃይቁና። ኦኒካ ሺቃናው ዳንዳዳና ፖፖን ዴዔስ። ኦኒካ ኢያ ቤዒቤና፤ ቃሲ ቤዳናውካ ዳንዳዳና። ቦንቾይኔ ሜሪና ዎልቃይ ኢያው ጊድ። አሚንዒ።

17 ሃ አላሚያ ዱሬቲ ጮ ቆያ ሻሎን ኦቶርቶና ሜላኔ ጨቆና ሜላ ኦዳ። ኑሰ ኮሺያባ ፓላሂሲዲ አሚያ ኑና አንጂያ፣ ዱሬ ያሳን አማኔታና ሜላ ኤንታ ኪታ። 18 ኤንቲ ሎያ ኦሶ ኦላናዳ ሎያ ኦሶን ዱሬታናዳ፣ ኬሃታኔ ሃራታሰ ሻኬይሳታ ጊዳና ሜላ ኪታ። 19 ሄሲ ኤንታው ሲንላሰ ሚኖ ባሶ ጊዲያ ጊሾ ሄ ዎዴ ኤንቲ ቱማ ዴያይ አይ ዳኒያኮ ኤራና።

20 ዲሞቴዮስ፣ ኢሲ ኢሲ አሳይ፣ «ኤራቴላ» ጊያ ኤያ ፓላማፔኔ ሃዳ ኦዳፔ ባቃታ፤ ኔው አሜቴዳ ሃዳራ ናጋ። 21 ኢሶቲ ኢሶቲ ኑሰ ኤራቴላ ዴዔስ ያጊሼ አማኑዋ አጊደሶና።

ያሳ አጼ ኬሃቴላይ ሂንቴ ኡባራ ጊድ።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source
files dated 29 Jan 2022
c35d6c73-3843-5482-b53e-7559d35deee5